



MUHYIDDIN Yassin melawat gerai Pizza Pah Food di tapak Festival Ramadan Putrajaya di kawasan Kiblat Walk sepanjang laluan Masjid Tuanku Mizan Zainal Abidin dan Kompleks Perbadanan Putrajaya, Presint 3, Putrajaya, baru-baru ini. Turut kelihatan Presiden Perbadanan Putrajaya, Tan Sri Aseh Che Mat. - BERNAMA

PUTRAJAYA 13 Julai - Festival Ramadan Putrajaya yang dianjurkan Perbadanan Putrajaya (PPj) bukan sahaja menyediakan pelbagai program menarik tetapi turut menawarkan juadah berbuka puasa untuk 1,500 jemaah setiap hari.

Festival yang dilancarkan Timbalan Perdana Menteri, Tan Sri Muhyiddin Yassin pada 10 Julai lalu itu turut menyediakan agihan bubur lambuk dan perkhidmatan bayaran zakat fitrah secara pandu lalu.

Program lain yang diadakan ialah solat tarawih bersama Imam Samy Ahmed Abd. Rahman El-Feky dari Mesir di Masjid Tuanku Mizan Zainal Abidin serta tadarus al-Quran dari awal Ramadan hingga 26 Julai ini.

Turut diadakan ialah jualan Kiblat Walk sepanjang bulan Ramadan, jualan makanan untuk berbuka puasa dan perayaan Aidilfitri serta pameran.

Festival yang julung-julung kali diadakan di Putrajaya itu menggabungkan aktiviti keagamaan, perniagaan dan juga hiburan bercirikan Islam seperti persembahan artis dan muzik tradisional bagi memeriahkan suasana Ramadan di Putrajaya.

Aktiviti sampingan yang turut diadakan ialah pertandingan kuiz untuk pelajar sekolah dan ceramah motivasi pekerja.

Orang ramai yang mahu mendapat maklumat lanjut mengenai festival tersebut boleh melayari laman sesawang www.ppj.gov.my/ramadhan untuk keterangan lanjut.

Artikel Penuh: http://www.utusan.com.my/utusan/Kota/20130714/wk_01/Juadah-untuk-1,500-jemaah#ixzz2Z0QXIHZo

© Utusan Melayu (M) Bhd